

Tuzlanski sport u 2017.: „Labudice“ jedine osvjetlale obraz

Sumorna slika tuzlanskog kolektivnog sporta nastavlja se, a ovogodišnji učinak u prvom dijelu sezone, poražavajući je.

Jedina svijetla tačka su rukometašice Jedinstva AtlasRelaxa, koje su u prošloj sezoni bile viceprvakinje BiH i to je najbolji plasman jednog tuzlanskog tima na državnoj razini. Ako se uzme u obzir da su se plasirale i u završnicu Kupa BiH, koja nije odigrana, utisak je apsolutno povoljan.

„Labudice“ su i u povoj sezoni na drugoj poziciji, u Kupu BiH imaju velike izgleda da se plasiraju u završnicu Kupa, pa da ga poslije dugo vremena i osvoje. Umjesto trenera Jasmina Unkića došao je Damir Cipurković, ništa se bitnije nije promijenilo u ciljevima i realizaciji.

Jedine su izašle na međunarodnu scenu, a protiv PAOK-a su u Tuzli ostvarile jedinu pobjedu u šest nastupa bh. ženskih klubova. Ta pobjeda (31:30) popravila je koeficijent rukometnih klubova na listi EHF-a.

To što su rukometašice već treću sezonu najuspješniji klub Tuzle u elitnom takmičenju, ne znači da takav tretman imaju u budžetu grada ili kantona. Naprotiv, podatak da košarkaši OKK Slobode za iduću godinu imaju prihod od Grada od 120.000 KM, košarkašice Jedinstva, na primjer, 20.000, a rukometašice 10.000 KM dovoljno govori o odnosu gradskih otaca prema ovom klubu.

Bilans Jedinstva AtlasRelax u 2017. godini je debeli ++

Za razliku od njih, muški rukomet tone u seniorskoj konkurenciji, napreduje u omladinskoj. Sloboda Solana je mijenjala Skupštinu, izbacivali su novinare iz skupštinskog sastava po direktivi Gradske uprave. Oni koji su krivi za srozavanje ugleda kluba, ostali su u Upravi (čast izuzecima), starih asova nema ni u upravi ni u stručnom štabu, a činjenica da već dvije godine ne uspijevaju dooći ni blizu povratka u Premijer ligu sve govori.

Bilans Sloboda Solane u ovoj godini je debeli —

Nogometaši Slobode su uoči nove sezone najavljivali Evropu, u prošloj su igrali Ligu za prvaka i bili „topovska hrana“ Zrinjskom, Željezničaru, Sarajevu i Krupi, a u ovoj se pad nastavio.

Trener Vlado Jagodić je morao otići, Slavko Petrović je primio klub gooreći kako cilj ostaje isti, a to je Liga za prvaka. Umjesto borbe za vrh, akruelna je borba za opstanak. Jedina svijetla tačka je plasman u polufinale Kupa BiH.

Stanje u klubu je trenutno vrlo konfnuzno, uskoro će prozivka, Skupštine nema, pa se ne zna ko će ostati, a ko u proljeće voditi bitku za opstanak.

Bilans FK Slobode u ovoj godini je debeli —

Košarkaši OKK Slobode prošlu sezonu okončali su veoma uspješno. U regularnom dijelu prvenstva bili su drugi, izborili su Ligu za prvaka, u polufinalu su poraženi od Igokee, kasnijeg šampiona BiH.

Očekivanja da će taj trend biti nastavljen u novoj sezoni, nisu se obistinila. Ekipa je umjesto najavljene borbe za Ligu prvaka došla u poziciju da igra Ligu za opstanak, mada do kraja prvog dijela sezone ima vremena za popravak trenutno veoma lošeg položaja – 4 pobjede, 6 poraza.

Došlo je do rzlaza s trenerom Velimirom Gašićem, klupa je povjerena njegovom pomoćniku Eldaru Kavgiću, koji u dvije utakmice ima poraz i pobjedu.

Pokušaj plasmana u Drugu ABA ligu također je bio neuspješan, prvenstveno što uprava nije dovela zvučnija pojačanja u ekipu, tako da je i taj plan neslavno završio.

Bilans OKK Slobode u 2017. godini je tanki + i debeli –

Košarkašice Jedinstva loše su završile prošlu sezonu, u ovoj je došlo do (ne)planske smjene generacije, a rezultati su nikad gori. Klub je napustila Melisa Brčaninović koja igra u Italiji, a to se itekako odrazilo na igre i rezultate ekipe.

Serija teških poraza na muke stavlja trenera Mirzu Oštrakovića koji je na poziciji prvog trenera naslijedio Maru Lakić Brčaninović.

Otkazali su saradnju glavnom sponzoru BH telekomu, novi “pokrovitelj” je firma Piemonte.

Publika, kao pokazatelj zanimanja za neki sport ili klub, nije saveznik košarkašica Jedinstva s obzirom da se na utakmicama okupi jedva pedesetak gledatelja.

Bilans košarkašica Jedinstva u 2017. godini je debeli —

Odbojkašice ŽOK Slobode u prošloj i ovoj sezoni igrale su finale Kupa Federacije, lani i Kupa BiH.

U prošloj sezoni plasirale su se u Ligu za prvaka i to je bio maksimum. U ovoj sezoni najprije je ustoličen trenerski tander Malović – Zahirović, pred početak prvenstva otišlo je u druge klubove nekoliko bitnih igračica. Podmlađeni sastav dobro je startovao, ali je što zbog povreda što zbog neiskustva uslijedio pad sa serijom poraza.

Tuzlanke su trenutno još u igri za Ligu za prvaka, ali se generalno ne može se očekivati od ekipe koja jedva sastavlja kraj s krajem da napravi značajniji proboj u vrh bh. ženske odbojke.

Bilans odbojkašica u 2017. godini je tanki + i tanki –

Tu se, otprilike, završava slika tuzlanskog kolektivnog sporta. Nikad lošija!

Bilans tuzlanskog kolektivnog sporta u 2017. godini je debeli -!

FK Sloboda —
Jedinstvo AtlasRelax ++
Sloboda Solana —
OKK Sloboda +-
Jedinstvo Piemonte —
ŽOK Sloboda +- (tl)

Date: 31-12-2017